

## La'ó Hamutuk

### Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-77234330 (mobile) email: laohamutuk@gmail.com

Website: [www.laohamutuk.org](http://www.laohamutuk.org)



Dili, 5 Juñu 2020

Exmo : Sr. Demétrio Amaral de Carvalho, Sekretáriu Estadu Ambiente (SEA) - RDTL

Fatin : Ediffisiu - Fomento, Mandarin Dili

Asuntu : Problema Ambientál no Impaktu Mudansa Klimátika iha Timor-Leste

Ho Respeitu,

La'ó Hamutuk nudár organizasaun sosiedade sivíl nasional ne'ebé mak hala'ó knaar ba peskiza, analiza, advokasia no tau matan ba polítika estadu nian no polítika husi instituisaun internasionál sira liga ho prosesu dezenvolvimentu iha Timor-Leste. Nune'e bele fasilita komunikasaun entre povu no nia ukun na'in sira atu bele ezije katak povu mak sai autór ba nia prosesu dezenvolvimentu iha Timor-Leste. Ami fiar katak protesaun ba ita nia meu-ambiente no nia riku soin sira mak importante tebes ba ita nia moris ohin loron nian no mós ba futuru oin mai.

Tanba ne'e prosesu dezenvolvimentu hotu iha Timor-Leste tenke respeita no tuir lei hodi garante no proteje ita nia rekursu ambientál sira. Atu festeza Loron Mundial ba Ambiente nian iha loron 5 de Juñu tinan ida ne'e, Liu husi karta aberta ne'e La'ó Hamutuk hakarak fahe ho ita boot sira no povu Timor-Leste ami nia observaun no hanoin kritiku balu kona ba problema ambientál liu-liu impaktu husi mudansa klimátika iha Timor-Leste no mundu tomak.

Ami sente kontente ba servisu mutua entre LH ho SEA, durante liu dékada ida, hamutuk ho Ajensia Nasional ba Lisensiamentu Ambientál (ANLA) no mós Departamentu sira seluk hodi asesu informasaun no dadus importante sira kona ba problema protesaun meu-ambiente relasiona ho dezenvolvimentu projetu infraestrutura boot sira iha Timor-Leste no mós preokupasaun sira seluk ba problema mundiál ne'ebé liga ho mudansa klimátika.

Ami mós apresia ba SEA nia servisu durante ne'e, maske iha dezafiu oin-oin maibé instituisaun ida ne'e hahú hatudu rezultadu balu ona ezemplu: adere ona tratadu internasionál sira ne'ebé regula kona ba protesaun ambientál ninian, estabese polítika no lei nasional sira hodi kontrola poluisaun ba atividade indústria sira, Dekretu Lei Baze

Ambiente<sup>1</sup>, Dekretu Lei Lisensamentu Ambientál, Dekretu Lei kona ba Konservasaun Biodiversidade<sup>2</sup> implementasaun polítika zero plástiku no mós lei no polítika importante sira seluk.

Ami nafatin enkoraja SEA atu garante implementasaun polítika no lei sira ne'e, nune'e hadi'ak liu tan servisu no rekursu internal atu bele hadi'ak prestasaun servisu iha futuru oin mai.

Tuir mai ami hakarak hato'o ami nia analiza kritiku no hanoin balu kona ba asaun saida mak Timor-Leste tenke halo, no pozisaun Timor-Leste ba dezvoltamentu ida ne'ebé fó konsiderasaun as liu ba sistema no implementasaun lei ambientál sira.

Hanesan ita hatene katak, mudansa klimátika daudaun ne'e sai asuntu global no emerjénsia ne'ebé nasaun hotu iha mundu hasoru, nasaun balu mak kontribui ba emisaun gas no balu sai mós vítima ba ida ne'e. Mudansa klimátika mosu tanba rezultadu husi atividade umanu nian. Emisaun gas estufa mak kauza temperatura sai aas, no bele estraga estabilidade ekolojiku ne'ebé to'o ohin loron sai hanesan fonte moris ba ema no natureza.

Kauza husi hahalok umanu, atividade deforestasaun, no uzu ba kombustivel/mina fossil iha mundu tomak mak rezulta ona aumentu temperatura ba grau 1 kompara ho tempu sira antes ne'ebé sei menus ho atividade indústriia no ida ne'e sei kontinua aumenta se bainhira ita la foti asaun imediatu atu minimiza mudansa klimátika antes sai piór liu tan no ita sei estraga moris jersaun aban bain rua nian.

Realidade to'o ohin loron problema barak hahú mosu iha nasaun barak inklui Timor-Leste, hanesan ezemplu: ita hasoru problema bailoron ne'ebé dura ba tempu naruk, rai maran hodi rezulta produsaun agrikultura sai ki'ik liu, nivel tasi aumenta aas, inséndiu ka floresta sira ahi han, no impaktu negativu seluk ne'ebé sei sai at liu tan tanba temperatura aumenta. Impaktu seluk ne'ebé afeta tebes ba Timor-Leste mak kondisaun klima ne'ebé aumenta extrema (cyclones) hanesan agora ita hasoru no tempu udan ne'ebé susar atu halo predisaun (ne'ebé afeta tebes ba agrikultór sira iha Timor-Leste, problema inundasaun no rai monu no seluk tan.

Ambiente labele identifika husi fronteira nasaun nian. Akontesimentu iha fatin seluk ka rejiaun dook mós bele afeta ba ita nia ambiente – tanba ita hotu moris iha ambiente ne'ebé interligadu, no sei fó mós impaktu ba ekonomia no situasaun sosiál iha mundu tomak.

Maske nasaun ida-idak hasoru difikuldade la hanesan ne'ebé rezulta husi mudansa klimátika, maibé ita la bele proteje ita nia ambiente liu husi asaun ba idak-idak nia an rasik, no to'o ohin loron seidak iha nasaun ida ne'ebé bele rezolve problema ne'e

---

<sup>1</sup> Dekretu Lei N° 26/2012 kona ba Baze ba Ambiente, bele vizita:

<https://www.laohamutuk.org/Agri/EnvLaw/2012/JRDLBasesAmbiente26-2012PtTe.pdf>

<sup>2</sup> Dekretu Lei N° 6/2020 kona ba Konservasaun Biodiversidade, bele vizita:

<https://www.laohamutuk.org/Agri/EnvLaw/div/JRBiodiversityDL6-2020pt.pdf>

mesak. Ita presiza ezije no halo asaun global; atu asegura katak temperatura la aumenta liu grau 1.5, no ita presiza hamenus emisaun estufa mínimu 45% molok tinan 2030.<sup>3</sup>

Kontribuisaun Timor-Leste ba mudansa klimátika ohin loron sei ki'ik liu kompara ho nasaun boot sira maibé ita vulneravel liu ba impaktu mudansa klimátika. Maske nune'e ita tenke kuidadu tanba posivelmente Timor-Leste sei kontribui mós ba problema mudansa klimátika iha futuru oin mai bainhira ita nia governu kontinua implementa projetu indústriia petrolíferu no gas tuir planu ohin loron nian. Daudaun ne'e Timor Leste nudár tarjetu ba projetu husi ajénsia internasionál sira kona ba adaptasaun ba mudansa klimátika hanesan ezemplu: "Ai ba futuru" programa GIZ<sup>4</sup>, no mós projetu balu husi UNDP<sup>5</sup> kona ba reforestasaun. Maske programa kuda ai ne'e importante duni ba konservasaun no protesaun ambientál, maibé projetu hanesan ne'e parte ida husi programa carbon trading ne'ebé kontra justisa klimátika. Liu husi programa hanesan ne'e, nasaun hanesan Australia no Estados Unidos, koko atu justifika, mantén no haboot sira nia indústriia fatuk anar metan, no tipu enerjia seluk ne'ebé kontribui maka'as ba mudansa klimátika no direitu comunidade indígena nian.

Mezmu ita esforsu maka'as tebes ba adaptasaun mudansa klimátika, nasaun industrializadu sira kontinua kontra no la kumpre akordu internasionál sira hanesan Akordu Paris nian, no taka matan ba rekomendasaun UNFCCC no prinsipiu justisa klimátika. Governu Timor-Leste presiza husu ba nasaun boot, liu-liu ba doadór sira, atu foka ba hamosu ekonomia ne'ebé sustentável no foti responsabilidade ba kauza mudansa klimátika tuir prinsipiu justisa klimátika nian.

Aleinde ne'e, Governu Timor-Leste tenke halo avaliasaun ba programa no projetu sira ne'ebé implementa ona nune'e, ita bele ajusta modelu dezvoltamentu ida ne'ebé tuir Timor-Leste nia kontextu no mós kontinua tuir Objektivu Dezenvolvimentu Sustentável- (ODS), Ezemplu: hapara projetu hirak ne'ebé bele estraga floresta sira, projetu ba atividade indústriia mineiru, projetu mina no gas hirak ne'ebé bele afeta ba kontaminaun iha kalohan no biodiversidade iha tasi okos, fó ameasa kontaminaun bee moos iha rai okos, hamenus produsaun agrikultura, redús atividade peska sira, no seluk tan. Ho nune'e ita nafatin kuidadu no asegura katak jersaun oin no futuru la bele sofre ho rezultadu negativu sira ne'ebé kauza husi asaun no implementasaun sira ne'ebé la konsidera sustentabilidade husi ita nia ambiente.

Ami espera, ukun na'in sira liu-liu SEA no instituisaun estadu sira seluk sei foti asaun no desizaun ne'ebé di'ak no rigorozu hodi mantén Timor-Leste la bele monu ba krize global mudansa klimátika hodi nune'e la bele sakrifiika ita nia ambiente ba jersaun ohin loron no aban bain rua.

---

<sup>3</sup> <https://www.ipcc.ch/sr15/>

<sup>4</sup> Projetu Ai ba Futuru sei utiliza kuaze 6 hektar rai hodi kuda ai tokon 3 ba suku 40 iha munisipiu 4, bele vizita: [https://ec.europa.eu/international-partnerships/projects/ai-ba-futuru-sustainable-forestry-timor-leste\\_en](https://ec.europa.eu/international-partnerships/projects/ai-ba-futuru-sustainable-forestry-timor-leste_en)

<sup>5</sup> Projetu Dezenvolvimentu Korredór Estrada Díli-Ainaro (DARDC), ba trimestre daruak 2017 nian, bele vizita: [http://www.tl.undp.org/content/dam/timorleste/docs/Projects/DARDC/Bulletin/DARDC%20Bulletin%20April-June\\_TETUN.pdf](http://www.tl.undp.org/content/dam/timorleste/docs/Projects/DARDC/Bulletin/DARDC%20Bulletin%20April-June_TETUN.pdf)

**Hamutuk ita salva ita nia planeta no hamutuk ita bele..!!!**

Mak ne'e de'it ami nia karta, ba ita boot sira nia kolaborasaun ami hato'o obrigado wain.



Marta da Silva no Adilsonio da Costa Junior

**Ekipa Koordenasaun La'o Hamutuk**

Kópia ba :

1. Exmo Primeiru Ministru Taur Matan Ruak
2. Exmo Prezidente da Repúblika, Sr. Francisco Guterres "Lú Olo"
3. Exmo Prezidente Parlamentu Nasional, Sr. Aniceto Longuinhos Guterres
4. Exmo Ministru Agrikultura no Peskas Sr. Pedro Dos Reis
5. Exmo Ministru MCAE em exercisio, Sr. Francisco Martins Da Costa Pereira Jerónimo
6. Exmo Ministru Obras Públiku, Sr. Salvador Eugenio Soares Dos Reis Pires
7. Exmo Ministru Transporte Komunikasaun, Sr. José Agostinho da Silva
8. Exmo Prezidente ANPM, Sr. Gualdino da Silva
9. Media no públiku